

Wasserwercken / auch springenden Brunnen vnd mancherley Pumpen / auch wie man das Wasser mit sonderlichem Vorthail / vnd geringer Mühe vnd Kosten auff die Höhe zubringen vnd zu leiten / selbst mit seiner eigenen Hand / zum zierlichsten vnd verständigsten / dreyhundert Stück gerissen vnd vorgezeichnet. Ist auch sein vornehmen gewesen / solche jedermänniglichen / vnd seinem lieben Vaterland / durch den offenen Truck alles publiciren zu lassen / vnd an den Tag zu geben: Auch solch Werck nit allein vor ihnen heimlich behalten / sondern auch andern Leuthen damit zu dienen vermeinend.

Weiln er aber durch den zeitlichen Todt / an seinem Vornehmen verhindert worden / ist es also verblieben / biß endlichen solch Werck an mich gelanget / vnd mir zu Handen kommen. Als hab ich meines Theils an mir nichts wöllen ermanglen lassen / vnd meines Großvaters Intent vnd Wolmeinen nach zu kommen / vnd jedermänniglichen zum besten / (wiewol etwz spät) dieses Werck / wie ich es gefunden / in offenen Truck zuverfertigen / vnd zu publiciren nicht vnderlassen sollen noch können.

Wann dann in E. E. vnd F. Wt. Gewerb vnd Handelsstatt Nürnberg / in welcher alle Künste vnd Handtwerck zum höchsten floriren vnd im schwang gehen / auch allerley Mühlwerck / welche nit allein von den Wassern / sondern auch mit der Hand / vnd von Thieren getrieben werden / vnd zu vielen nutzbarlichen Sachen gebraucht vnd gemacht werden / daselbsten oblich seyn. Auch damit jederman / so dieses Mühlbuch zu sehen bekompt / darauß Anleitung nemē könnte / vielleicht mit kleinern Vncosten vnd grösserm Nutzen / etwz darauß zu sehen / vnd zu seinē Besten vnd Nutzen anrichten vnd machen lassen könnte.

Als